



# ABDIAS

Maaaring nagsulat si Abdias pagkatapos ng taong 500 at bago nasakop ang Edom sa taong 312. Puno ng mga sigaw ng paghihiganti ang kanyang mga tula, na sa pinakapuso ng mga ito ay nagpapakita ng pananampalataya niya sa katarungan ng Diyos.

## Laban sa Edom

<sup>1</sup> Ang pangitain ni Abdias. Salita ni Yaweng Panginoon tungkol sa Edom:

May balita kaming narinig galing kay Yawe, isang tagapagbalita ang ipinadala sa mga bansa: "Tayo na, tayo na laban sa Edom!"

<sup>2</sup> Pinaliliit kita sa mga bansa, lubha kang hinahamak ngayon.

<sup>3</sup> Dinaya ka ng kapalaluan ng iyong puso, ikaw na nakatira sa mga guwang sa batuhan, na nananahan sa kaitaasan, at nagsasabi sa sarili:

Sino ang magpapabagsak sa akin sa lupa?

<sup>4</sup> Pumailanlang ka man tulad ng agila, at magpugad sa mga bituin, pababagsakin pa rin kita mula roon – salita ni Yawe.

<sup>5</sup> Kung pasukin ka ng mga magnanakaw, mga mangungulimbat sa gabi, di ka kaya malipol?

Di ba't nanakawin nila sa iyo ang gusto nila? Kung dumating sa iyo ang mga mamimitas ng ubas,

di ba't kaunting ubas lamang ang kanilang ititira?

<sup>6</sup> Sinaid nila ang bayan ni Esau, tinangay lahat ng natatago niyang yaman!

<sup>7</sup> Itinaboy ka sa mga hangganan ng iyong mga kakampi;

ipinagkanulo ka ng iyong mga kaibigan.

Ang mga nakisalo sa iyong tinapay ang lihim na naglagay ng bitag sa iyo.

<sup>8</sup> Hindi ko ba wawasakin sa araw na iyon, sabi ni Yawe,

ang matatalino sa Edom,

at ang nakaunawa sa mga bundok ng Esau?

<sup>9</sup> Mangingilabot ang mga mandirigma mo, Teman,

at papataying lahat ang mga nasa kabundukan ng Esau.

<sup>10</sup> Dahil sa karahasan mo laban kay Jacob na iyong kapatid, matatadtad ka ng hiya at mawawasak magpakailanman.

<sup>11</sup> Nanatili kang nakaabang sa araw na iyon, habang binibihag ng mga dayuhan ang kanyang hukbo,

pinapasok ang kanyang mga pintuan, at pinagpapalabunan ang Jerusalem. Isa ka nga rin sa kanila.

<sup>12</sup> Huwag mong matahin ang iyong kapatid sa araw ng kanyang kasawian.

Huwag mong ikatuwa ang pagkakita sa mga anak ni Juda

sa araw ng kanilang pagkawasak,

ni magyabang sa araw ng kanilang kagipitan.

<sup>13</sup> Huwag kang pumasok sa siyudad

ng aking bayan sa araw ng sakuna,

ni matahin sila sa kanilang kasawian

sa araw ng kapahamakan,

ni agawin ang kanilang kayamanan

sa araw ng kagipitan.

<sup>14</sup> Di ka dapat mag-abang sa mga krus na daan

para patayin ang mga tumatakas sa kanila,

ni ipagkanulo ang mga natira sa kanila

sa araw ng kapighatian.

<sup>15</sup> Sapagkat malapit na ang araw ni Yawe

laban sa mga bansa.

Kung ano ang ginawa mo,

ito rin ang gagawin sa iyo.

Pagbabayaran mo ang iyong mga ginawa.

<sup>16</sup>Kung paano kayo uminom sa aking banal na bundok,  
walang tigil ding iinom ang lahat ng bansa;  
iinom sila nang iinom,  
at magiging parang hindi pa umiiral.

<sup>17</sup>Ngunit magkakaroon ng mga matitira sa Bundok Sion,  
– nakatalaga sila sa akin –  
at babawiin ng bahay ni Jacob ang pamana nito.

<sup>18</sup>At saka magiging apoy ang bahay ni Jacob, lagablab ang bahay ni Jose;  
magiging dayami naman ang bahay ni Esau, susunugin nila ito at tutupukin  
at walang matitira sa lahi ni Esau, sapagkat si Yawe ang nagsalita.

<sup>19</sup>Sasakupin ng mga taga-Negeb

ang mga bundok ng Esau,  
ng mga tagakapatagan  
ang lupain ng mga Pilsteo.  
Sasakupin nila ang Efraim at Samaria,  
at mapapakay-Benjamin ang Galaad.

<sup>20</sup>Magmamay-ari sa Kanaan hanggang Sarepta  
ang mga Israelitang ipinatapon.  
Ang mga ipinatapon namang taga-Jerusalem

na ngayo'y nasa Sefarad  
ang magmamay-ari sa mga siyudad ng Negeb.

<sup>21</sup>Aahon na sa Bundok Sion ang mga tagapagligtas  
upang maghari sa mga bundok ng Esau.  
– Saka maghahari si Yawe.



# JONAS

Sa kasalukuyan nating panahon, kakaunti lamang ang nagkakamali tungkol sa uri ng aklat na ito at nagtatanong kung nabuhay nga bang talaga si Jonas, at kung tatlong araw nga siya sa tiyan ng isang isda.

Isang kuwento ang libro ni Jonas, pero marapat na ituring na propeta ang sumulat nito dahil maliwanag na nabigyang-diin niya rito ang ilang katotohanan na nalilimutan na ng kanyang mga kasamahan.

Pinupuna ng kawili-wiling salaysay na ito hindi ang mga dumidiyo sa iba o ang mga di makadipuna kundi ang mga relihiyosong Judio mismo na sa pagkakulong sa kanilang nasyonalismo ay madali nilang nalilimutan na ang Diyos ay Diyos ng lahat ng tao.

## Pinapunta ni Yawe si Jonas sa Ninive

**1** <sup>1</sup>Ang salita ni Yawe na dumating kay Jonas na anak ni Amittay:  
<sup>2</sup>“Magpunta ka sa Malaking Siyudad, ang

Ninive, at mangaral laban dito sapagkat umabot na sa akin ang kanyang kasamaan.” <sup>3</sup>Ngunit umalis si Jonas para tumakas pa-Tarsis na malayo kay Yawe.

• **1.1** Ayaw sumunod ni Jonas sa tawag ni Yawe: dahil marahil sa hindi niya nararamdamang responsable siya sa kaligtasan ng kasuklam-suklam na mga Ninivetang iyon. Tulog siya habang sinisikap namang ilitas ng mga mandaragat na mababait na pagano ang barko (gayong hindi ito gawang may

kinalaman sa relihiyon, nakatawag-pansin din ito sa relihiyosong si Jonas). Natutuwa siya sa pag-iisip sa parusang ipataw ng Diyos sa mga paganong taga-Ninive. Inirereklamo niya ang pagkahabag ni Yawe sa mga taga-Ninive dahil sarili niyang reputasyon ang mapapasama rito.